

續修楓涇小志卷二

志建置

里人程兼善達青重纂

官署

嘉善縣主簿署 在鎮南均安橋西頭門三楹左土穀祠右彰

義祠大堂二堂各三楹內署共八楹咸豐十年燬於兵同治

五年主簿張庭萱請帑重建署初在縣治東南乾隆六年主簿曹廷基請於大吏移駐楓涇

應役四名轄奉賢鄉五區近查八中區亦屬主簿管轄惟八中係永安鄉為西塘本區前志未載茲仍之

婁縣巡檢署 在鎮北泰平坊頭門至內署並三楹咸豐十年

燬於兵

初屬青涌駐小蒸故曰小正司順治十三年縣初設遂撥屬婁因移駐焉乾隆三十四年撥應役弓兵十

六名轄一二保西三保

白牛務 在鎮南務前坊元時設明初改為稅課局兼收王店

楓涇小志

卷二 建置

新豐新行鍾埭白馬堰等市課程後廢善志

鋪驛

楓涇鋪 在張涇匯後改張涇鋪今廢

巡警鋪三 一在務前坊 一在鉗雲坊 一在仁濟坊鋪兵

每鋪一名今廢善志

急遞鋪 在高陽坊自風涇東接泥滑橋為十二里見婁志舊有鋪兵四

名今廢

風涇驛 在秀州塘宋時設驛船五隻船戶四十戶今廢婁志

元無名氏記畧曰環雲間皆水唯西南塘路可通郡故郡

以風涇為喉襟蓋出入無不由此至元癸巳南省許置驛

有鄉之好事者張某及近保數巨室來助木瓦之費今與

同僚度其地令站官陳青創十二間起四月十五日畢七月十六日至於規模日宏締構日增浙右傳舍第一之稱當俟後來諸君姑勒石以告厥成

驛站

同治三年正月奉設驛站

咸豐兵燹後各驛被毀時進剿嘉湖踞賊

署前設

正站斜塘鎮分設腰站用代馬船四月斜塘鎮腰站移設楓

涇鎮十一月俱奉裁

全浙肅清公文遞送悉遵舊制見善志

營汛

楓涇汛營房二

一在鎮南響水橋南

外委一員戰兵二各守兵七名見善志

一在鎮北海慧寺北

外委一員汛兵二名見婁志

今並廢

義建

戴氏義塾

元戴光遠建久廢

善志

球場即其遺址

今球場為某姓建屋佔去

楓涇小志

卷二

建置

二

金華黃潛記略曰嘉興郡城東北五十里曰白牛鎮居民無慮數百家為其鄉之望者曰暘谷處士患鎮學之弗立規創義塾未遂而歿其子光遠承其志度地於鎮之東若干步廣袤可二十畝而贏考正面勢召匠簡材揆日興作先聖先師之殿峙其中講堂踞其後齋廬翼其旁邃廡穹門下至庭逼庫庾直舍之屬總四十五楹而圖史之藏什物之須纖悉畢備周以繞垣環以幽篁佳木花徑果蹊而瀦其流泉為芰荷菰蒲之區七十畝經始於至正六年八月迄七年十月而告成八年春二月延師儒招來學用仲丁行釋菜禮退即講席序進而講業焉四齋職教者各一人人生員百五十人割上腴田五百畝贍之於是慈溪黃伯

誠玠以高文宿德主教事俾來求予記之

楓涇社學二 一在白蓮寺明正德十二年嘉善知縣倪璣借設寺中嘉靖甲寅倭夷犯境寺燬學廢 一在常平倉側明

萬曆二十四年嘉善知縣章士雅建今廢俱見善志

講約所二 一在四南區張涇匯今廢善志 一在鎮北高陽里

明時建後改城隍廟即今大堂址

義塾 在鎮北城隍廟左側同治七年婁縣知縣迮常五奉文捐廉設立八年正月里紳許辰珠捐金二百以痘神殿廢址改建塾舍

楓溪書院 在鎮北留鳳坊同治七年陳宗溥陳垣郁以瀚程熙雍郁宗蕃等規創募捐舊房一所田一百二十三畝撥南

楓涇小志

卷一 建置

三

關帝廟田四十四畝續募田十八畝經費支絀講堂齋舍未建課期借集同善會館光緒九年婁縣知縣陸冠瀛添課加獎十三年嘉善知縣莊鳳啓增朔課捐廉給獎嗣後因之二十八年改校士館學堂興科舉停後即將租息改撥遂廢校士館

登瀛小會 光緒十年郁宗蕃募集洋銀二百五十圓存典生息助里中善籍士子鄉試之費後復募積共洋四百九十五圓科舉停後其洋改購滬杭鐵路蘇省股份一百十股

學堂 一曰誠化初等小學校光緒三十一年乙巳春開辦校董沈椿姚有錚等校舍租北木橋西塊沈姓房屋 一曰敬業初等小學校與誠化同時開辦校董葉理封鄒宗勳等校

舍租界河內李姓房屋以上兩校經費以茶猪肉布酒絲等捐及婁縣義學捐款爲宗嗣因經費不敷兩校公議合辦

一曰誠敬初等小學校三十三年丁未春即以誠化敬業兩校并辦以充公之沈姓房屋爲校舍三十四年戊申春原校董沈椿葉理封鄒宗勳邀同鄧一鳳程世敏沈樞沈樂唐等協議改辦誠敬初等小學校稟准撥提本鎮積穀轉息項下錢三百千文作爲常年經費宣統二年庚戌春改辦高等小學校校長李沅三年辛亥春李江接任校長 一曰詳通初等小學校宣統二年庚戌春開辦校董葉理封以高陽坊祥通庵改立

以上在鎮北

一曰開智初等小學校光緒三十一年乙巳開辦在三保二

楓涇小志

卷二

建置

四

十四圖長浜 一曰長德初等小學校三十四年戊申開辦在一保十九圖陳家河 一曰方興初等小學校三十四年戊申開辦在二保頭圖方家罇 一曰慈雲初等小學校三十四年戊申開辦在二保四六圖黃字圩 一曰尚義初等小學校宣統元年己酉開辦校董懷祖蔭在一保十八圖屈家浜校舍以仁壽庵改立

以上俱鎮北鄉間

一曰勵志初等小學校光緒三十一年乙巳春開辦校董陳銓衡沈樞張慶衍等校舍租鎮南張姓房屋宣統二年於西庵場餘地創建校舍遷焉 一曰養正初等小學校與勵志同時開辦校董李沅謝福駿等校舍租致和橋下塘謝姓房屋以上兩校經費以原有書院租息及煙茶肉布等捐爲宗

宣統三年復租校後謝姓蔡姓空地添造校舍增闢操場

一曰務義初等小學校三十二年丙午冬建校舍於同善會

館中三十三年三月開校校董即同善會司事經費即出於

同善會租息項下 一曰幼稚學舍宣統三年辛亥春郁崇

瑞郁崇照程邦垣等集貲創立男女並收在晏公橋下塘郁

崇照宅

以上在鎮南

一曰蓮溪初等小學校宣統二年庚戌五月開辦校董徐秉

剛楊師震周大鏞等在九北區姚莊橋鎮三年八月被鄉人

打毀 一曰崇新初等小學校宣統二年庚戌五月開辦校

董楊師震周大鏞徐秉剛等在四北區俞家匯鎮

以上俱鎮南鄉間

一曰薇枝初等女學校光緒三十二年丙午開辦校董李沅

楓涇小志

卷一

建置

五

葉理彰校舍借接嬰堂不籌公款宣統三年并入南鎮幼稚

舍 一曰麗德初等女學校光緒三十三年丁未開辦校董

沈樞沈庚照王文熙張慶衍沈樂唐等校舍租馮家街口王

姓房屋

以上在鎮北

同善會館 在鎮南均安橋北乾隆二十年合鎮士民公建房

屋二十餘楹咸豐十年毀於寇外有市房六楹在米篩橋北

今葺之爲公所焉 會始於乾隆元年越七年具呈兩省大

吏立案蔡維熊倡集千金會以佐經費四十年吳燦繼舉千

金會道光十八年主簿李楨里人郁道銘等整理其事同治

十年公舉郁以瀚等十人司其事會中管業田七百八十三

畝八分又置程姓田三十一畝

嘉慶元年黃靜夫倡施絮襖王啓焜捐五十領樂善者咸

助捐由館中散給至三年又施蚊帳襖帳相易庚申以後此舉遂廢

蔡維熊碑記天下事無難易顧力行何如耳力行非難一衆人心力久而弗怠之爲難此我楓鎮同善會之所由記也會始於前明高忠憲陳幾亭兩先生乾隆元年黃君學海得其遺書嘆爲法良意美隨處可行遂合諸同志李君賓揆公育戴君義廬懷南兩昆仲張君博侯顧君諒哉黃君文河莫君鳳綸等倡舉於鎮北以朱君中黃元林昆季所建桂香閣爲會集歛散之所間左之顛連待舉火者慶若更生鎮南諸君子如麟暉李君明揚朱君等聞而義之爭先飲助雖以予之懶散無似亦竭緜力効贊襄焉是會也首先節孝重大倫也次及孤貧憐無告也游惰不及寓

勸懲也查訪必覈杜冒濫也其捐輸也不一格故事易集其散給也有常期故無稽待更有暫給以通其權有陰濟以妙其用月有要歲有會昭著於衆耳衆目而質臨以天地神祇蓋諸君子之用心專而公且勤自始事以迄今如一日云乾隆八年增修同善會書成呈明江浙撫軍陳公常公并浙藩潘公俱蒙優獎溫諭并檄取其書徧頒闔屬飭勸舉行而是會駸駸遍江浙矣蓋我鎮北連峯泖南走魏塘實爲兩省交衢善緣彰徹需用漸繁慮其不可以經久也乃集百人爲千金之會凡百日而竣事次第增置義田以爲恒產人以會事寔廣收發期會規模不可以不展也乃公置會館一區於鎮南四中區務前坊凡爲屋二十

餘楹價值四百餘金修葺之資三百餘金出於捐項以甲戌年四月經始丁丑年十月竣事先是黃君文河於會中董事尤力凡牒請兩省大吏往來跋涉不避寒暑其勸捐輸也不惜苦口至爲市井不逞者所詬厲衆心幾阻余以爲爲山九仞不可以浮言奪也力爲解其不平而諸君子之爲善也益奮義會之舉亦惟余首倡焉今茲會館落成將勒石於廡而諸君以記文屬余余惟古道之行不獨親其親子其子是爲大同蓋風俗之成其端自上其流自下上下相維以成大同之世善莫大焉我鎮以彈丸一區沐浴盛朝重熙累洽之化諸君子耳濡目染惟日孜孜以成此鄉鄰風俗之美而爲四方所則效固將爲采風者所

必書而余幸以禮先一飯得援筆以誌其盛且樂舉諸君子合力併心不懈益虔之義以垂法於無窮也故不辭而爲之記 梁同書跋云此會自蔡封翁倡始行之有年而中間續成之者吳鷗村氏也乾隆四十年冬吳君復舉千金之會以總事爲己任至今又二十年樂善不倦并序刻逐年收支徵信錄分送同人以冀日漸增廣共成義舉蓋事圖始難圖終更難吳君眞善信人哉因檢向時蔡記屬余友介請書之入石以表所自因得悉吳君近事而附識之

許辰珠會館徵信錄序吾鎮之有同善會館創始於乾隆紀元爲南北士民公建之所迨中葉寔衰賴河廳長白李

公振興其事不至廢墜己而郁封翁澹園等偕南北紳士分任其勞司年司月更相交代一秉至公自道光辛丑迄於咸豐丁巳凡十有七稔歲有盈餘悉刊入徵信錄昭示同志矣其八九兩年已繕清冊付劄劄氏不意俄延旦久厥工未竣致外間嘖有煩言余時未董其事竊嘗叩諸司帳云咸豐十年館中積存冬米三百石未及糶變又存典生息於程君寅谷處合計洋銀一千一百元足錢一千一百千文分立兩券又支應南北團練公費錢一千四百千文外存洋三十餘元錢一十餘千留存館中爾時米價雖平銀價大貴統核錢串原不下五六千千爲數尙鉅無如入夏以來警報日急司事者倉皇出走未及交代既而魏

塘失陷孫君雲濤等謀所以保衛之方遂於存典項下向程君寅谷抽取錢四百千文換券未來至九月而錢米什物悉付焚如此事遂不可問矣 皇上御極之二年劉太史秉璋督軍攻克楓涇時郁明經子靜招致舊時司帳丁君保三來鎮徵租會余同在善後局中邀與諮議余以經理乏人義不敢辭然兵燹之餘諸凡草創地方枯瘠田畝荒蕪所入既艱所出不能不謹倘得經費稍充一切善事不難次第舉行再有盈餘可以續增田產至於從前善信捐輸之長生愿以及襖帳瘞埋等各項名目暫從裁汰嗣後專收租息以應給貧善舉惟收支各欸向例逐年刊刻今因爲數無多積至三年始能成帙用是登諸梨棗以示



同志幸垂覽焉新  
增

育嬰堂 康熙時里人陳仁創乾隆初廢陳培有序紀之

接嬰堂 光緒三年集捐錢一百千存典生息稟請婁縣知縣陳熊才准於漕項內提給錢二十四千又逐時募捐以補不足十六年稟縣准撥瑞和典捐錢一百二十千暫借婁邑鄉徵局爲接嬰公所今衆善信集捐善邑田四十一畝有奇婁邑田一百二十五畝有奇又長生愿善邑共二百零九愿婁邑共三百四十愿每愿每年捐錢三百六十文光緒二十四年由楓溪書院撥助婁邑十一圖惟字圩公地一畝二分三釐四毫創建嬰堂分稟善婁兩縣樹案遷辦每年收支刊有徵信錄分送各捐戶司董葉世熊程世娘朱運新姚錫綸

楓涇小志

卷一

建置

九

顧秀鍾郁崇光陳銓衡沈椿葉有圭沈開祺李沅鄒宗勳郁崇年

沈祥龍接嬰堂徵信錄序周官養民之政慈幼爲首蓋萬民之生必始養於幼時也 國朝雍正二年五月特設育嬰堂於京師詔各直省郡縣倣行繇是松江府及浙之嘉善縣治先後並設嬰堂楓涇地界江浙間去松五十里去善半之向無嬰堂四鄉寥廓農民多貧乏或產子女不能自育者往往委諸溝壑而憚遠送於育嬰堂聞者憫焉光緒三年郁孝廉耘甫等始鳩貲接嬰而堂猶未建二十四年葉君培卿廣文偕同志創議卜地構堂又得遠近諸君子集金以助堂賴以成其中爲奧爲室爲俯爲庖規模麤

備第堂無恒產常年經費恒苦不足而廣文昕夕經理孳孳不倦魏塘錢觀察君硯聞其事而躉之稔知諸君子之實事求是也慨然以集資爲己任前後籌助得千金存本生息藉補不給堂有司年有司月有女司事酌雇乳婦輪流哺養嬰少則育於堂中以待良家領撫多則分送松善兩堂凡接嬰孩疾痛疴癢以迄寒燠煦嫗任事諸君無不各盡其力之所竟俾嬰之得所而後已葉君之言曰是堂之成實賴同志諸君始終弗懈而經費之艱鉅不得不先其所急以故分任司年司月各司其責而於司帳姑從闕焉比以接嬰已屆一載除領撫外儘數乳哺他日嬰愈多費愈鉅則仍從所議章程分送松善嬰堂留養推葉君之

心由接嬰而底育嬰詎有己量哉夫以楓涇一隅地即此接嬰一事誠足體天地大德曰生之義而宣廣 皇仁於無窮矣倘異日者經費日益充經理日益善俾是堂與松善兩堂並峙永久則棄孩溺女之俗不因之長革乎今葉君等以出納冊刊錄徵信爲書數語於簡端以誌緣起

新纂

米業公所 在鎮北尤家場光緒三十四年米商徐志華徐志

文程樹榮等集貲公建

木水匠公所 在鎮北朱家橋內水匠李永貴木匠李玉田等集

貲公建

自治公所 一在鎮南借設玉虛觀內宣統二年十一月成立

鄉董一名鄉佐一名議員十名管轄區域四中區全四北區

至牛橋港共十三圩九南區上下辰圩南北列圩 一在鎮北借設城隍廟內義塾舊屋總董一名董事一名名譽董事四名議員二十名新纂

北鎮商會分所 光緒三十四年秋由松江商會提倡設立楓涇北鎮商會分所呈請農工商部立案奉部頒發鈐記於宣統元年正月十七日成立所屋未建權借米業公所為辦事

處新纂

### 倉庾

常平倉 一在四南區王帶鎮明萬曆二十四年創今廢善志

一在海慧寺乾隆十七年婁縣知縣俞喬仁創今廢婁志

義倉 在鎮北城隍廟內右側同治八年婁縣知縣金福曾就

### 楓涇小志

卷二

建置

十一

楊王殿廢址又置王姓田五分以充基地建廩八楹積穀二千二百二十二石三斗董事郁以瀚陳垣程炳程希曾沈森經理參婁續志存穀之外又存錢八千餘串遵章存典生息名正本常年八釐起息其息轉存生息名息本常年五釐起息均由縣飭諭婁境各典分派領存其領狀繳呈在案自光緒初年至初次平糶垂二十年正本息本積存錢四萬四千餘串光緒三十一年由倉董程福基稟縣詳准添造涼穀廳三間客坐一間曬穀場二十四方丈并圍牆等共費錢一千四百串又價買倉外田四畝五分宣統元年倉董又稟請府縣詳准 藩憲添建倉廩二十間大廳三間書房兩間又面西並廳兩隻客坐一間後門一間備術三條走廊二十餘丈曬穀

場增廣四十方丈并前共六十四方丈地基統加四尺餘高  
圍牆共約二百方丈共費洋八千七百八十六元照松郡洋  
價計算約一萬一千七百餘串又支錢一千六百六十四千  
兩共費錢一萬三千三百串有奇光緒二十四年至宣統三  
年其間平糶五次約支貼虧米價錢二萬串有奇再楓涇學  
堂自光緒三十一年創辦以來至宣統三年八月止前後共  
撥積穀存錢三千餘千串統查是年八月止實存錢一萬四  
千六百二十七千有奇儲穀三千三百十四石九斗九升穀  
價每石約洋三元左右倉中刊有前署婁縣沈唐撰婁縣楓  
涇鎮積穀倉記碑附平糶章程鎮鄉分別辦理鎮上各戶向  
係零糶倉內設立米櫃聽糶或一日或二  
日多至五日併糶為限大口每日七合小口每口五合按戶  
給憑摺摺上只編第號無名姓全人體面底册註明名姓坊

楓涇小志 卷一 建置 十二

里以備檢査米櫃設四個月為率鄉問各圖離鎮遠者二十  
里來去須費一日功夫平糶時多在農忙是以每戶應有若  
干米一次併糶以省農工間有錢不湊手聽其分糶以體貧  
戶三十圖分派十二日挨圖出糶不准拔前預糶只准過  
期補糶以免擁擠紊亂大口三斗小口減半米價照市七折  
左右一挨鎮鄉平糶告竣將糶戶姓名米數按戶開明分給  
各圖榜示鎮上將各戶米摺第號  
糶去米數逐一開明榜示新纂

清賢堂 在四中區金字圩基地五畝二分一釐貞節婦丁沈  
氏捐建並捐匾田若干畝留養貞節婦女二十餘口光緒三  
十三年由翰林院撰文錢駿祥呈部 奏奉 諭旨准建坊  
表並給樂善好施字樣新纂  
坊表  
崇賢坊 在鎮南明為王達立今廢  
經魁坊 在四南區王帶鎮明為支立立今廢

進士坊 在鎮南明爲干璠立今廢

旌表坊 在鎮南暗衝口明爲郁震妻顧氏立今廢

貞節坊 在九南區明爲李文遠妻張氏立

青雲坊 在九南區明爲陸嶽立

御醫坊 在九南區明爲吳照立

百歲坊 在鎮南響水橋西 國朝爲程緒祖立

狀元坊 在鎮南杏花坊爲蔡以臺立

旌節坊 在四南區東黃圩爲張孔成妻朱氏立

節烈坊 在四南區往字圩爲吳樹禮妾胡氏立今廢

貞節坊四 一在鎮南爲趙錫妻顧氏立今廢 一在鎮南仁

濟坊爲吳扶來妻孫氏立 一在鎮南杏花坊爲蔡學夔聘

楓涇小志

卷一

建置

十三

妻姚氏立 一在鎮北始字圩爲楊士熙聘妻胡氏立新纂

節孝坊三 一在一保石牌漾爲戴振瑗妻孫氏立 一在三

保角釣灣爲諸濤妻朱氏立 一在一保惟字圩界河內爲

張桂妻葉氏立新纂

貞孝坊 在鎮南金字圩爲丁以泳聘妻沈氏立新纂

義士坊 在鎮東雪水涇塘爲邵繡亭立新纂

寺觀

定慧教寺 在鎮南務前坊本名白蓮寺俗呼南寺宋咸淳二

年僧德山趺坐三日地生白蓮三莖衆異之共建寺元末燬

於兵明洪武中僧大通重建二十四年定爲教寺嘉靖間爲

倭所毀後又重建迨 國朝雍正九年僧德恆募貲里人諸

建侯等勦助重葺乾隆三十九年僧際智募建方丈齋堂十  
王殿嘉慶四年嘉善知縣萬相寶改今名僧樹蓮遠震募貲  
修正殿善志咸豐十年兵燬同治初僧覺峙空航建僧房數楹  
光緒四年建方丈

張讎詞花宮好近市絕塵埃徑曲常隨修竹轉僧神曾得  
白蓮開芳氣徹靈臺 閒隨喜路熟踏蒼苔一派清香參  
妙諦數聲幽磬覺如來欲去首重回

性覺寺 在鎮西河沿上舊名月明庵明萬曆時顧誠心捨地  
僧性本募胡文昇損貲建 國朝康熙四十四年 南巡僧  
本冲迎 駕雲間 召對稱 旨 御書性覺寺三字以  
賜之善志咸豐十年燬於兵光緒四年僧永澈募貲重建

楓涇小志

卷一

建置

十四

邑人曹廷棟詩小庵門掩五雲高曾許袈裟接 御袍題  
字輝煌榮拜 賜 玉階親切見 揮毫 張正鑑詩  
翠華巡幸留 宸翰武水溪頭煥梵宮欲識仁風翔洽處  
茅庵老衲被 恩隆

東林寺 在四南區張涇匯龍王堂後創建莫考咸豐十年燬  
於寇有康熙四十六年所樹碑尚存已漫漶不可讀

妙常庵 在鎮南王家橋西唐太和中創後毀時有船子和尚  
者緇素挹其道化因結庵請居元末僧靜輝重建明成化間  
有普明禪師出而名始播於叢林善志萬曆中僧妙峯建寂照  
堂 國朝嘉慶時里人許煌捐貲重建大殿咸豐十年燬於  
寇同治初僧本空募建觀音殿僧房數楹

蔡以臺詩細碧侵階長嫩苔昔時曾築讀書臺一軒春雨  
邀僧話半夜秋聲入竹來迢遞幾年成往事蕭條三徑喜  
常開豹奴莫負分陰在墨鬪松煙日費才

善善庵 在鎮南即蔭和亭明時建爲夏日施茶之所俗呼茶  
亭 國朝康熙時僧德能建廊亭外乾隆五十三年金國良  
等倡捐重修里人張身濤夢有老人示以善善之名因顏之

善志咸豐十年燬於寇同治六年僧昌祖募貲重建光緒初續

### 建廊

里人張心培詩亭向清風涇畔結門臨一帶碧波開潑洄  
幾派東流水日夜隨潮往復回 來往乘風無數帆橋邊  
流水響潺潺解煩喜有施茶社垂蔭還憑幾樹杉

### 楓涇小志

卷一

建置

十五

峨嵋庵 在鎮南生字圩明僧峨雲建志今廢

永壽庵 在生字圩順治十年僧明圓建今廢善志

日光庵 在鎮南新街今廢

曉蓮庵 在四中區雲字圩今廢

秋水庵 俗呼清水庵 在四中區暑字圩

發心庵 在四中區許家村

藥師庵 在四中區龍堰裏光緒五年重建三楹

惠民庵 俗呼九里庵 在四南區創建莫考咸豐十年燬於寇同治

八年計承瀛等集貲重建

三隱庵 在四南區東黃圩明崇禎十四年建 國朝康熙十

七年僧隱浮秋淵純一等重修善志

福明庵 在四南區沈家埭

善慶庵 在四南區寒字圩順治七年僧寂定勸里人丁永齡

建善志

中丞錢繼登記畧曰庵之有善慶也余蒼頭丁永齡所構也永齡年七十而癯獨白首婆娑恫此生之有盡悵來世之無期爰擇清風涇南誅茅築室選大梅檀作菩薩像朝夕瞻禮焉

普濟庵 在四南區張涇匯舊名觀音堂明正統元年建 國

朝康熙六十年僧見源重修善志

入積庵 在四北區菜字圩明天啓時建 國朝順治初邑人

蔣時芬捨基增建佛堂善志

楓涇小志

卷一

建置

十六

成道庵 在四北區虹溪康熙三十七年重建

蓮花庵 在四北區上陽圩創建無考乾隆十八年僧三明大

文重葺後燬嘉慶三年僧守璞募貲重建善志

福良庵 在四北區戴浜創建莫考嘉慶二十一年里人盛韶

等重建

太平庵 在四北區律下圩明嘉靖時郁袞創為飲蜡所善志

國朝咸豐時毀同治三年僧覺明募建

清涼庵 在四北區律下圩宋時建明吳道全重修後漸圯

國朝同治初重建善志

光德庵 在九南區宋陳舜俞以其地與僧契嵩為焚修所明

天啓四年僧宗明募建 國朝嘉慶五年建大殿庵藏唐僧貫休畫羅



漢十六軸傳數百年後  
為邑豪購去見善志

大悲庵 在九南區橫涇

化成庵 在九南區元至正二年僧彌壽募建性嚴增葺 國

朝咸豐以後正殿已毀尚存僧房數楹

善志

徐維城詩放舟渺入水雲鄉曲徑通幽草木香古樹摩空  
凝暮靄奇花舞景媚初陽自無囂俗來禪境應有煙霞貯

客囊餅鉢隨緣聊可託不辭信宿此山房

陸家庵 在九南區馬涇今名崇福庵

洪福庵 在九南區姚莊明崇禎元年建

善志

永凝庵 在九南區大玉圩咸豐時兵毀後重建

衍慶庵 在九南區北暑圩明季創 國朝康熙間僧湛願募

楓涇小志

卷一

建置

里人孫衍暨唐某重建衍又捐放生河

善志

三官堂 在善善庵南

俗呼六里庵

創建莫考同治中廢光緒元年

沈晋康等建涼亭於其址

龍王堂 在四南區騰字圩明萬厯間里人錢珠貴捐田十畝

并捐堂後水港為放生河 國朝乾隆五年僧允輝募修嘉

慶三年邑令萬相寶捐廉倡修并上雷雨經綸額

善志新增

福源宮 在楓涇鎮四中區東出圩迎秀橋西明嘉靖間里人

李元實倡捐建

中本及隨糧王像

國朝咸豐間毀光緒十二

年僧祖望募貲重建

新補

福明禪院 在四南區宇字圩創建莫考 國朝康熙二十年

里人徐蘭林重建

新補

清靜庵尼庵 在四中區小港里咸豐時兵毀光緒初重建三楹

蔣庵尼庵 在鎮南今廢

天德庵尼庵 在鎮南芙蓉灣今廢

寶樹庵尼庵 在鎮南南陽村今廢

靜修庵尼庵 在四中區高家浜今廢

寶勝庵尼庵 在四中區餘字圩網埭

福興庵尼庵 在四中區唐家涇今廢

右俱在善界

海慧教寺 在鎮北宋建隆初里人姚廷容捨宅建初名興國

福壽院治平元年改為海慧院舊傳寺有八景曰水波壁留

春亭轉藏殿毀精進閣並久廢金沙灘圓田匯留慶河八角井

楓涇小志

卷一

建置

今尚存志 國朝康熙十七年重葺山門及兩毀禪堂額曰

風溪第一山乾隆時趙金簡書 二十二年僧貫庵復建精進閣於寶

華堂後咸豐十年悉為兵毀同治十三年僧眞通建地藏殿

精進閣光緒二十二年里人沈崧重建寺

宋陳舜俞經藏記秀州樵李之粵壤華亭鶴唳之名邑白

牛村在其西有人煙之富海慧院於其間為蘭若之勝先

是賜紫僧奉英智力膚敏傑為主者乃募人書所傳之經

其函八百其卷五千四十有八居人吳氏子行義施仁號

為長者為之募財僱工作轉輪而藏之其屋若干楹載龕

載琢飾以金碧以某月某日落成白牛居民陳舜俞敘而

贊之曰天下之險東有泰華南有衡岷西有崑崙龍門北

有太行羊腸此天所以限方域也然而寶貨出焉而負重者至草木禽獸生焉而樵蘇弋獵者往馮者蹶而傷下者踣而死又生生之大患也聖人爲之觀轉蓬而作車以載之巖岷決而溪通崑屺碎而塵飛視千仞以爲垣化顛踣以爲安車之爲利蓋遠矣無名之山慳貪之阻嗔恚之罔癡暗之崔巍詐妄之叢棘深林淫亂之坑谷溪澗而衆生莫之能免也於是教之以法爲車以布施爲駟以禪定爲輪度脫諸險不墮生死始於自載終於載人故此經之輪不爲無意也況夫我爲法輪致遠由己有相雖外發心必內心轉輪駛心止輪柅舉眞如之性海一指而徧盡塵沙之法門有念斯足須彌納於芥子滄海入於毫端眞體道

之樞機利物之關鍵作之者可謂妙用施之者不爲無窮之利乎若夫山澗同平安險一致馳騁乎無傲之駕遨遊乎無方之機非作非止孰溺孰載吾非斯人之徒其誰與游然殊途同歸何遠之有

宋僧德葵精進閣詩五月六月火雲蒸家家納涼前後庭樓頭四鼓五鼓急閣上猶聞人誦經

楊應標重修碑記畧曰風涇屬吳越交境市衢之北有海慧教寺創自宋初里人姚諱廷睿授將軍之職捨宅建造陳令舉楊鐵崖諸先生題詠猶存數百年間陵谷幾變大抵補救扶傾人謀是賴若予所見貫庵師之勞於修壑後先因果之奇誠足證天人而垂不朽也師工詞善書法予

筮仕之前即時步上方周觀諸寶相丹青剝落歲戊午修繕山門兩殿一日衆匠方升木誤損文殊金身師驚惕之際仰見火燄柱上隱留墨迹緣梯諦視有成化中本山善亮捐貲塑成倘日久凋落繼序其新之字于時稽首領囑未幾而殿工告竣而塑像之役尙有待也今癸酉春師過予乞募疏疏一啓沈君思雲均野顏君俊生僧湛虛並允獨塑大像予亦稍捐舊俸以佐洪工其餘願捨善姓悉無靳色計佛菩薩六十六尊浹旬之內各任無遺而當日像虧書現若假執役之手昭示衆人不亦奇乎夫乃知佛之神通不可思議而師之福德不可量也貞珉之勒其可缺乎予既樂觀其成更欲使人知志堅者行必卓也于是援

楓涇小志

卷一

建置

二十

筆而爲之記

寶藏禪寺 在古聖堂巷宋熙甯初邑人吳廷亮建白牛禪師

開山紹興五年賜額後廢

婁志

南華嚴寺 在一保七圖季漚港宋天禧中建

婁志

西華嚴寺 在一保七圖陸堂港宋天禧中僧道隆建 國朝

康熙五年重修

婁志

白蓮寺 在一保十八圖白蓮缺宋紹興中建僧居簡有記

婁志

國朝咸豐十年毀於兵同治初里人重建三楹

定光庵 在鎮北桃源巷西漢乾祐元年建宋景定中重建明

季毀 國朝康熙時里人沈伯廷重建就餘址築來仲堂華

亭沈宗敬書花梵重瞻額以贈咸豐十年毀於兵

明張世美詩一徑幽深薜荔叢佛樓突兀倚晴空小樓煙  
水楓溪接上刹雲霞慧海通慈竹迎風暄聚雀蒼藤挂樹  
曲蟠龍貧僧避事門常掩誰道尋幽客興濃 國朝里人  
王之圻詩可喜莊嚴古寺新己非昔日冷荒榛兵戈定後  
開蓮社鐘磬鳴時見上人徑繞紫藤花蔽日雲深綠竹鳥  
鳴春白牛古蹟推祇樹選勝逃禪不厭頻 沈應榴詩清  
風一派接蓮池肅仰遺徽邈有思紺宇力綿千載業青松  
手植百年枝間憑花梵重瞻日靜對雲峯聳秀時煙水小  
橋何處是空餘竹徑步前師 沈日鎮詩曲徑尋幽去短  
垣護竹扉潭空人影瘦苔長土花肥聳秀峯仍在逃禪客  
不歸樓西頻悵望煙樹但霏微

楓涇小志

卷一

建置

二十一

永鎮庵 在鎮東凌家堰東順治初建咸豐十年毀於寇

吉祥庵 在鎮北燈草田南今廢

祥通庵 在鎮東高陽坊創建莫考光緒初重建後殿今改學堂

祖龍庵 在一保三圖明季創建

慈悲庵 在一保七圖庵浜

蓮錫庵 俗呼楊家庵 在一保八圖明嘉靖時里人楊茂春捨地募

建沈倫張文元助田數畝 國朝順治十年重修楊其芳有

碑記

崇敬庵 俗呼斯和庵 在一保九圖明嘉靖時御史馮恩建 國朝

咸豐十年毀於寇同治初僧眞通重建

長生庵 在一保九圖黃涇

西指庵 在一保九圖鶴鶴灘

貝葉庵 在一保俞匯咸豐十年寇毀同治十二年重建

法雲庵 在一保十三圖范浜

三乘庵 在一保十四圖三穀浜

圓通庵 在一保十七圖長浜明萬曆二十五年費朝寅捨地

僧廣空募建舉人王獻吉捐田十三畝以贍梵修庵結水湄

塘水東注兩岸壁立名古龍門

松府志參  
曹小志

大方庵 在一保十九圖釣鉤浜

鳳鳴庵 在一保二十圖林家蕩康熙初建

福敦庵 在一保二十一圖土地堂

鳳棲庵 在一保二圖菱漚乾隆年建

楓涇小志

卷一 建置

二十一

藥和庵 在一保二圖菱漚有東西二庵

普光庵 在一保二十六圖四莊浜乾隆年建

集福報國水陸禪院 在白牛市宋淳熙九年建今廢

婁志

梧桐禪院 在一保四五圖即古吳河廟相傳三國孫吳時建

婁志 國朝咸豐時兵毀同治時里人重建

小普陀 在一保十六圖查家浜

小雲棲 在一保十六圖藺家浜康熙八年陸豫生建

觀音堂 在鎮北印家橋內今廢

梵香林 在鎮北凌家堰順治六年里人王無欲建元元章何

君泰襄贊成之有十景曰碧泛亭雙桂軒鑑古閣靜勝居望

月隄看竹處洗硯池聽松石狎鷗渚落雁灘咸豐時僧宏道

募修十年毀於寇光緒八年里人重建山門采入婁續志

僧南宗十詠山亭臨水際倒影入空明竹寫一窗翠松搏萬壑聲遙天雲外見皎月鏡中生即有魚龍混終能澈底

清碧泛雙桂亭亭立山窻寂寂開境同秋共冷香與月俱

來交榦攢金粟重陰覆碧苔一楹聊寄迹漫作小山猜雙桂

軒禪餘誰共對閣有古人書開卷千秋在澄心一點虛高

深通造化瑣碎及蟲魚隻字留疑義空將四庫儲鑑古世

路行難盡幽居心易安罷參閒箸笠枯坐異蒲團有意空

中得無生定裏看寂寥方寸許殊覺海天寬靜勝一筇探

夜色夾岸水泠泠兔魄升清漢漁鐙淡遠汀露溥千樹白

星混九霄青本欲期人共難教醉夢醒望月啓戶延清爽

楓涇小志

卷二 建置

二十三

幽然對此君一林湘水合半畝渭川分節勁誰能並心空

自不羣子猶如獲到相對忘斜曛看竹欲覓魚吞處林間

水一方祇知能滌垢何意得含章天人渾無象波迴覺有

香淵源深莫測應有黑龍藏洗硯池何年星隕此偏得近高

松自聽生公法永辭秦帝封苔斑蹲繡虎濤沸舞獮龍欲

返無聲處踟踟到夕鐘聽松石機忘心不競最愛海邊天我

獨游惟此鷗羣到己先泳游芳草地嬉笑野雲邊日暮情

逾密波澄月又圓狎鷗渚水接平沙處聯翩集雁鴻只圖魂

夢穩那計稻梁空月襯蘆花白霜凝楓葉紅幽偏憎繳遠

不與上林同落雁灘

紫竹林尼庵俗呼在鎮北古聖堂巷乾隆四十八年里人即

寶藏禪寺故址改建成豐十年寇毀同治時尼珍林募建

右俱在婁界

仁濟道院 在鎮南仁濟坊梁天監元年建唐貞觀十九年賜

今額宋建炎時重建附高王祠

俗因呼高王廟

明宣德五年建三清

殿壁畫天神種種具相嘉靖三十六年遭倭夷難院毀隆慶

六年道士張大經募貲重建萬厯時里人顧際明重修 國

朝康熙二十三年里人張心培等倡捐改古桂軒爲文昌閣

乾隆七年妙正真人婁近垣捐貲蔡維熊經理重修嘉郡錢

陳羣有記三十年里人重建高王祠

善志

咸豐十年毀於寇今

惟杏銀二株獨存

前志

光緒二十八年四月十三日西首一株

火發自焚

楓涇小志

卷一

建置

二十四

元虞集高王祠碑記高王本畏吾兒之地所自出其先實帖木補花漢初城于西涼之永昌爲君長以分自存不侮于中國且爲邊鄙扞禦歲執貢與中國通錫賚甚厚稱都護小國王號也旣薨葬于其城之東北隅之高昌山以神靈顯乎中國福佑列郡而厯厯足徵詔許建廟遠邇人民罔不崇祀陰功居多永興初敕賜爲靈應高王自是人之災患有禱即應刻期而驗至唐邦人以封章具聞爰奉王敕追贈靈應高王擬王者服用殿宇復新祀事加豐時爲武德九年也惟王陰翌唐祚福庇黎元功施普天之下莫能悉考其實豈止一邦一邑而已哉其後裔蕃衍自唐而五代皆能茂著勳業奕振聲光顯德七年陳橋兵變宋太



祖夢神人冕旒袞服而言曰今天下爲宋祚矣問之何爲  
答曰吾高王也寤而鑠諸心後嗣大厯建祠于汴洛以嚴  
祀之建炎初高宗南渡扈駕從經東吳適皇妹薨痛戚無  
涯擇峯粵山以葬采訪吳會中僧道宮之精嚴元風闡揚  
者修薦之時有以仁濟道院典教道士朱太初爲舉特命  
奉行齋事頒綵緞六疋錢二十緡事畢具實以聞上因知  
有護教高王卽汴洛之高王也賜空閒腴田五十畝供神  
祠祀事考諸仁濟之所自蓋梁天監元年有道者張半山  
不知何許人由西蜀來寓楓涇道行高而善地理言此境  
亦一福地指一區建道院民安而物阜也人未之信至夜  
分鐘鼓法樂齊鳴居民異之有檀越舍地捐財不久而落

成四境有災疫旱溢祈禱必遂所懇半山道者工竟刻日  
而尸解于是道風大振高行雲集而未有額唐貞觀十九  
年具實以請賜額仁濟道院歷年寢久殿宇廊廡屢損屢  
葺太初歸真鄉之善士大有戴暘谷協贊衆擬重其新而  
撤其舊輪焉奐焉高王神祠建于殿之西旁設像冠冕旒  
服華袞事之惟謹道士陳玉琳朱道明道德兼資之士也  
懷香走都下再拜請言爲記刻石于祠用表神靈以詔後  
世予惟王之生也鍾毓山水之靈秀文武忠義輔世長民  
薨而受封靈應高王福民之功施于天下愈久而愈彰其  
神潔其儀肅所以戒茹葷者不享非禮之祭故也予嘗觀  
神僧傳有聰法師者受戒于風涇高王此其謬也王之代

天理物之德其盛矣乎豈有是哉在唐時嘗封卜古罕爲高王我朝仁宗皇帝以紐林的斤嗣亦都護册封高昌王皆實王之裔於戲王之所自出事甚神異其傳迄今數十代再世而三王存歿爲天下後世景仰王之仁德如天之雨露沛然澤物王之靈應如天之風雲不測變化高王由仁濟而安仁濟由高王而顯豈非元化之昭昭而合符神靈之赫赫者乎姑述其顛末使後之嗣法于仁濟道院延奉于高王祠者有所考知所自云

錢陳羣重修記略清風涇古刹以十數獨仁濟道院爲最著院當涇東南隅林野夷曠山禽水鳥千百爲羣樓殿出古木間掩映邃密惟是山門庠隘沿而未革觀覽者以爲

未足壯元都紫宮之色乾隆七年 敕封妙正真人朗齋婁君念是院爲入道受籙所從昭也捐貲重建擴而大之凡經營規制賴有蔡君星若實爲之董事閱一載乃告成余與朗齋素爲方外交屬記其顛末將刻石以垂諸久遠余惟浮屠老子之宮其赫然擅勝於名區都會間者何限然而訪寒山之殘鐘過瓊花之遺址適足供後人歎歔而憑弔則凡以得其人以興復之難也清風涇江浙間僻壤耳朗齋獨注意於少時之所棲託則洵乎勝地之必待人而顯而朗齋之敬恭桑梓不忘淵源尤足見宅心之厚且周其所以荷 兩朝之寵遇者且有本原也爰不辭而爲之記

玉虛觀

俗呼聖堂

在鎮南舊爲眞武祠創建莫考明洪武元年改

賜今額天順二年里人顧琮偕道士許拱盟募建彌羅大殿

及配殿後屢損屢葺

節善志

國朝咸豐十年燬於寇光緒初

里人以香雨堂道房故址重建六楹後三楹復被燬二十二

年里人沈崧重建大殿二殿并葺頭門

明周鼎碑記舊制張真人位置諸寺監卿士上祿秩視大

宗伯領道教事于凡政體無大關係者得專治之非有司

文移所得而預聞焉蓋以客禮外之故不官而錫以虛號

或檜襪可陰翊皇度未必無少裨也郡邑亦各設官以分

領之曰道紀道會在京曰道錄皆有印有吏自相爲文牘

以行其教門事真人府下之道錄道錄下之道紀道會猶

楓涇小志

卷一

建置

二十七

縣之上奉郡檄郡上奉省部符也人崇信之如神明然謂

朝廷重其教爲民祈福庶民體朝廷心敢褻視之哉洪熙

初元集京師羽流赴靈濟宮齋嗣四十四代真人奉詔處

右席從掌書許拱盟之請改風涇鎮眞武祠之額曰玉虛

觀俞道宗爲住持備行行在禮部下之本郡縣紀會二司

俾遵守之一如真人言此觀額之所由始不可不登之石

以諗來者知有其自也先是祠廢于宋之靖康而新于嘉

熙又毀于元社之將屋時再新之于國初倡是役者張仲

實氏張禱而得女亦自慶慰爰捨地以益厥址旁舍火祠

獨無恙亦不燬張所居益歸心焉嗣而葺之者顧子俊氏

顧爲張女之後不隳其前志謂兩厄于夷禍而祠以廢神

亦厭亂而有待也時和物豐而祠以新幸治之心神人攸同無旱乾水溢于一鄉維神之庥維聖王爲百神羣祀主夷不亂華而年穀乃順成也欲報上恩維祀報神可以信吾誠祠可不葺矣哉子俊歿子宗玉又益以址建二殿一未果囑其子文昱文昺成之拱盟繼主祠事又益募衆施新眞武殿作兩廡以次就緒蔡復初師拱盟爲兄宗玉妹郁節婦孫謹諮訓練皆左右之募于外者拱盟經度乎內者復初終始而成之者顧氏父子孫作山門者高年士王倫皆因舊而爲新同衆志而集事雖一祠之廢興不大繫于政而人心之知報與否時物之和與乖神人之相流通不相僞違亦于是乎繫焉此祠事之概因觀額而相連得

畫也拱盟化去而拱盟之弟子守元者介史凌霄以二事來謁余不詳書其作屋之工費與凡歲月當詳其爲子孫爲師弟善繼而新其爲志道教之與時政似各有專而相資以福乎民似有不可以相無者亦在所當詳也

聖堂 在四北區稱字圩明初建 國朝康熙十三年沈志高

倡修

善志

陸莊道院 在四中區結字圩今廢

善志

澄眞道院 在四南區雨字圩舊名高眞聖堂漢時創宋延祐

間黃巾兵過境院獨不燬衆以爲靈請賜今額

善志

國朝咸

豐時粵匪踞境院仍無損

邑人曹庭棟詩草色侵牆苔上墀當門臥柳老無枝千年

劫火消餘燼荒院名猶記漢時

巢林道院 在一保十一圖萋涇明萬曆丙辰玉虛觀道士張可靜構爲棲真所供奉斗母諸像左有存真堂精思閣歲久

傾圮 國朝同治初道士孫久傳重葺

采入婁續志

祠廟

關帝廟四 一在鎮南杏花坊順治三年居民因常平倉址創

建雍正七年里人汪承霽修乾隆二十四年程緒祖張正鑑

戴賓程永思倡捐修葺並增建後殿觀音殿文昌閣書廳韋

尊者殿三仙殿戲臺頭門

監工馮琴山程信侯汪靜功費鯤蔡岷懷等十餘人

嘉慶四

年僧奇元募里人王登墀倡捐重修大殿咸豐十年燬於寇

知縣莫大勳有記曰善邑之東北距二十里許有鎮曰清

楓涇小志

卷二

建置

二十九

風涇界接雲間之婁屬人居稠密商賈輻輳蓋屹然一臣鎮也鎮之南舊有關帝廟逼臨道左甚卑狹歷年久唯頽垣腐棟而已鼎革時萑苻嘯聚揚帆於湖泖間而鎮之無賴多附合之日往來窺伺於鎮人心震驚寢不安席每挈家室竄境外以避帝時顯靈異如有所見小人恐焉里之士民及新安諸商協謀保聚鎮賴以安事平二三父老及諳事者謀答帝恩聿新廟貌爲一方保障奈原祠基窄不能式廓爰度地勢有常平倉廢址久在榛莽中且當軍橋之南踞一鎮上游堪輿家謂建廟於斯易位北向鎮壓衝流不特可以綏神位薦馨香且於鎮大有攸賴遂相與申明承佃建廟仍照前朝公估例永免糧差爲請詳憲允行

其時智者盡謀貧者助力捐貲者無愆容不數年告竣而人之好義急公樂觀厥成者亦不自知其何以倘非聖帝之威靈顯赫保護斯民能使之翕然向風若是耶己酉春余宰茲邑即聞其事適以公事至鎮謁帝廟見規模整肅金碧輝煌瞻仰之下詢廟之所由建并閱帖文之所具載方悉帝眷之不可忘諸董事者之力不可泯也夫告虔之地非吉蠲弗饗創造之法非精勤弗協崇閎舄奕之觀非擇人慎守不能久遠繼事之人必如始事之人之心而後可以弗替今日者廟貌依然人情非昔保無有侵漁作踐任棟宇之崩頽者乎此顧子乃躬胡子應宸陳子文顧子廷詹金子兼陳子培程子旭林等惓惓作鮮終之慮而冀

後之同志者之益加飭厲也因稽其地則有三畝九分二釐八毫也稽其工則始於順治之丙戌成於己丑也稽其殫心任事則有張原素黃昌祿胡自成程履吉等也若夫矢願閉關有行僧真實勤勞奔走有里民周良皆不可以不紀余循諸子之請敬敘數言俾勒諸石以垂不朽云  
曹復元謁關聖殿詩紺殿重開俯碧川尙留英概想當年  
白衣搖櫓歸荆地赤馬嘶風上玉泉臂有箭痕忠刻骨髓  
餘生氣壯遊仙霜威一振中華後陸呂功名亦枉然  
一在鎮北永鎮庵旁順治初建同治二年燬於兵光緒二十二年里人沈崧重建

楊應標引略曰帝於鼎革之際相傳有保護功故里中東

南二境廟貌俱新而東隅基址則又於波濤洶湧中防隄捍築以有今日者也議者以鎮四柵之水俱從東瀉用是徇堪輿家言做善邑羅星臺規制建廟鎮之

一在二保四六圖婁志 一在三保角釣灣婁志

文昌閣二 一在鎮南仁濟道院舊爲古桂軒康熙甲子里人張心培等改建乾隆五十三年里人吳燦張身濤郁松垣濮光裕等倡捐重修善志 咸豐十年燬於寇

李永祺詩巍然傑閣俯臨空帝座遙憑呼吸通休覬朱衣頭暗點科名須問寸心中 蔡以臺詩破午到琳宮間雲一徑封樓高應蘸斗松古作游龍秀氣鍾潮汐文光映泖峯前賢吟詠處憑楹仰遺蹤

楓涇小志

卷二 建置

三十一

一在鎮北永鎮庵旁乾隆五十五年里人沈步垣蓉城倡建同治二年燬於兵十一年里人沈王佐等就永鎮庵觀音殿廢址改建文昌宮

魏塘錢濤詩獨上此高閣蒼茫繞暮煙僧歸殘磬裏客話斷雲邊水勢吞三泖鴉聲亂九天危欄俯空闊長嘯對飛仙 里人沈湘佩詩傑閣登臨望翠微夕陽斜照片帆歸雲開樹杪山留影點點蘆花兩岸飛

東獄行宮 在鎮南玉虛觀右側咸豐十年燬於寇光緒三年里人重建今廢

施王廟二 一在鎮南妙常庵左嘉慶十三年孫耀山等建戲臺陳暲獨建二堂咸豐十年燬於寇光緒二年朱漢等募貲

重建

一在鎮北海慧寺右亦燬於寇光緒元年里人募貲重建前殿頭門十六年鄧桐王錫汝等續募復建後殿

城隍廟四 一在鎮南杏花坊明萬曆時建 國朝雍正七年

嘉善知事郜煌倡捐重建咸豐十年燬於寇同治四年重建頭門八年郁以瀚程熙雍等募建大殿光緒五年程熙敏等

又募建戲臺寢宮

廟有捐田一百六畝九分五釐

一在鎮北高陽坊明季創 國朝康熙五十一年增建戲臺

大殿寢宮並築敬遠亭壘石鑿池道光時程以松鄭景喬等募建景福堂養福居鷗舫咸豐十年毀於寇祇存頭門同治四年許辰珠等募貲重建大堂戲臺光緒元年王錫汝募建

楓涇小志

卷二

建置

三十一

寢宮後數年復建迴廊

一在二保方家罇 一在三保城隍村

楊侯殿二 一在鎮南仁濟道院左側 一在鎮北城隍廟右

側咸豐十年並毀

痘神殿二 一附鎮南城隍廟右側 一附鎮北城隍廟左側

咸豐十年並毀

晏公廟二 一在鎮南務前坊元時建咸豐十年燬於寇 一

在鎮北永昌坊明沈某建 國朝道光二十年重建咸豐十

年寇燬同治十二年沈王佐等募貲再建

僧圓機詩蠟炬熏天祀晏公稱觴隊隊擁吳儂人歸瀚海

洪濤外靈駐乾坤正氣中一片忠懷垂信史千秋黎庶仰



英風卽今鄉曲猶祠廟轉覺君恩未有窮

金山古廟 在鎮北高陽坊祀漢博陸侯霍光今爲鄉農社廟

羅神廟 在鎮南褚家街東今廢

龍王堂二 一在四南區張涇匯善志 一在鎮東石堰上道光

時巡檢程德滋偕里紳募築石堰以餘貲建堂今廢碑存

都巡司廟俗呼王老相公廟 在一保九圖每年十月朔農人報賽極

盛采入婁續志

猛將廟 在四北區萋涇

陸宣公祠 在四中區陸莊宣公裔孫宋迪功郎瑀勗有祭田

五百十七畝明嘉靖二十九年裔孫申率族孫道乾移建所

居旁 國朝康熙時 頒內相經綸額歲春秋二仲官詣致

楓涇小志

卷二

建置

三十三

祭時存祭田七十餘畝見善志 咸豐時粵匪踞境祠宇獨存

明郡守蕭世賢記畧曰按唐史貞元相陸宣公爲吳郡嘉

興人嘗讀公之疏故知公之心因慕公也重嘉靖癸未余

出守茲土喜卽公之生里也而謁公於庭宿昔瞻仰之懷

於是乎遂公復有祠在嘉善縣奉賢里之陸莊歲久傾圮

越明年甲申其裔孫公泰葺而新之條陳顛末乞余言記

諸永夫公廟之在郡治者載在祀典守在有司雖百世不

磨此日祠堂而又偏於陸莊則視子孫爲隆替曩過姑蘇

謁文正公於范莊見其廟貌巍峨子孫環集公之後裔乃

與文正迴絕者豈君子之澤亦有不同也哉要之吳民業

田以爲恆產爲文正之後者獨荷優典咸復其家故聚而

無散惟宣公之後則無復焉而族故遼闊陸之弗競於范而祠亦緣之屢湮余無裨於始而惟慮其終子孫之典是祠也者倣范莊故事俾爲公之子孫者弗以產故徙而無歸公之祠堂也弗以子孫徙而無歸也而復落寞罔治此余自致於公之萬一也因移官文並刻於石用告來者喜善知縣倪璣詩勝地追先哲高風仰後賢精忠凌日月法象動雲煙故國江山外新祠花竹前於陵嘆世子抱病讀遺編 國朝里人曹奕雲詩欲把椒漿酹一卮徘徊感嘆起涼颼李唐天下今何在不及忠宣尙有祠

表賢祠 在九南區祀宋屯田員外郎陳舜俞其旁即舜俞墓舊爲僧舍改建殿堂門廡設木主以祀正德間鄉貢士陸嶽

楓涇小志

卷一

建置

三十四

白之縣令胡潔始肖像嘉靖二十八年知縣于業申明督學道置田贍祭 國朝康熙二十二年知縣崔維華泊邑紳士捐貲修葺裔孫煌復肖公像春秋丁次委官致祭乾隆間裔

孫永言等重整祠宇

善志

明太常寺卿呂憲表賢祠記墓而祠非古也仰其賢求其子孫不得有墓焉即而祠之禮也禮以厚民俗勸士風良有司之先務哉鄉先生賢良陳公諱舜俞字令舉魏塘人博學強記宋慶厯進士嘉祐間又擢制科第一授光祿丞簽書壽州判官熙甯初以屯田員外郎知山陰縣召試館職不赴時相王安石行青苗法先生不奉令上疏非之忤旨因自劾謫監南康軍鹽酒稅故與太博廬山劉凝之善

凝之高尙士歐陽永叔爲賦廬山高以美之者也先生遂棄官歸日跨犢以窮林塘之趣自號白牛居士去今五百餘年而鄉猶以奉賢名塘猶以白牛名涇猶以清風名郡城有三賢祠以先生配享於宣公也吳興有六客堂以先生友善於蘇軾也可想見其爲人矣墓在縣治東南七里有墩隆然而石函在焉兆爲市僧所廢銘則先生之孫光遠郡博撰者僧欲滅跡故碎之或從瓦礫中得石一隅始知先生首邱之處而寺有三木主其一則先生也孝宗二年部使者陳公金將廢無名寺觀父老以公墓言以故寺得不廢今餘二十年有識者率欲建祠以表章之而他司以爲非法令所及遂止嗟夫先生之不可及者三高才

擢冠制科讜言不阿時相敝屣以視浮榮謂非豪傑可乎千載而下孰能磨滅初亦不係乎祠之有無也然非祠則無以著賢有司善俗移風之舉舊有堂三間爲僧所踞墓鄰季清氏發憤陳之浙省不報頃者鄉貢士陸君嶽以本末自於縣令廣東區公越始克圖新其祠區公赴召又得滇南胡公潔來代二公皆名進士知以禮善俗移風者先後同志是以聚材鳩工不費不勞祠以就緒嶽偕守祠僧宗義屬余記是役也興於正德三年七月二日落於五年七月十五日因記而系之歌曰先生出處百世豪當宋仁廟登時髦哀然舉首紆恩袍判州宰邑心煩勞力詆言利臣貪饕執政發怒遷貶遭掛冠一笑甘遯逃身騎白牛戲

江皋忍覩新法紛如毛浮雲富貴曾足叨聲名同一廬山  
高彼者躁進者滔滔景慕異代即熏陶吉蠲俎豆陳香醪  
馬則神兮輪則尻既享八極從遊遨魄其蛻兮奚蓬蒿  
知縣于業歲祀祝文公奏昌言獨冠制科比之進士恩榮  
孔多公陳讜論力沮新法黜之監稅聲光愈烈既善於劉  
復交於蘇白牛故里清風穆如某等雅踐後塵仰高祠下  
歲事聿修以存鄉社

國朝知縣崔維華重修祠碑記武塘爲浙西大邑代有名臣  
而唐之陸敬輿宋之陳令舉實爲稱首敬輿當建中之後  
審因革之異宜糾皇躬之佚德言辭剴切天子動容蒼生  
仰望雖德宗用之不終而密勿論思羣稱內相亦足以少

展其所學矣令舉兩擢制科文章彪炳青苗之法朝廷公  
卿自韓琦呂誨數君子外咸側目不敢道令舉以山陰一  
吏指陳流弊投狀自劾放棄終身其視敬輿勢更難心更  
摯清風高節詎流俗人所能及乎獨敬輿族姓繁衍五百  
年來祠堂修葺蒸嘗勿替令舉一杯之土淪於灌莽即涇  
曰清風鄉曰奉賢愛慕之誠尙留道路而契嵩焚修之所  
幾不能復問良堪浩歎明洪武初年斷碑木主微露於荒  
煙蔓草之中茂才夏子孝廉陸君表其行誼相繼陳請於  
是區公立祠於前胡公肖像於後金沙于公復田贍祭別  
駕晉公條列祭品永蠲雜稅里人存舊德之思士于申景  
行之願先賢魂魄庶有依歸載在邑乘班班可考二百餘

年祠宇傾頽庭除荒穢春秋之祭僅循故事姦僧金隆道等侵漁租粒飽其私橐遂令祀典廢弛瓣香久斷此宋公所以傷心傅亮爲之隕涕也余承乏武塘先賢懿範勤思仰企凡屬祠廟每加整飭適耆民姚萬年等有侵租毀祠之呈因博稽前志徧訪輿人舉隆道所匿之田悉返汶陽付之祠僧文竺以供粢盛酒醴之需統計五十七畝有奇迺翦荆榛治庭圮旣勤樸斲爰施丹艘裔孫煌復肖公像白牛塘上懷令舉者將與敬輿之陸莊並垂不朽焉夫武塘節義冠乎七邑宏演納肝萇宏碧血蹈海沈河之士批鱗折檻之臣溯其芳軌令舉若有以啓之則夫廟貌之維新牲牲之庀潔當亦柳洲人士所傾心而樂觀也遂略敘

巔末俾後之人知棖栲几筵實爲劍佩衣冠之所寄勿使豪家俠少夤緣爲姦則余之深有望者已 又祭文嗚呼先生守正而不阿兮繫太邱之遺芳抑侶歐蘇而頡頑兮是魏塘之孔璋自慶厯以至嘉祐兮首制科而名香歷州邑而任勞兮并屯田而爲郎知山陰而辭館職兮忤時相而參商挹匡廬之西爽兮姑待罪於南康憫同朝之言利兮仍剗肉而醫瘡非天降而地出兮徒剗民以爲殃審所之而靡騁兮惟挂冠而退藏至今想見其遺風兮猶山高而水長歸田間以爲樂兮跨白牛以徜徉迄將老而營菟裘兮乃卜地於武塘閱六百祀而不封殖兮無城市而誰爲表章僅荒煙與蔓草兮幾不識其首坵之鄉憶當年之

爲鄰兮有招提之在旁忽功令欲毀無名之寺觀兮指公墓而得存其道場何反行其嫉妒兮碎碑碣而幾底於滅亡獨不見天寧與東塔兮賴買臣莊助而尙煌煌自正德以至今茲兮里老念先哲而不忘勵風教而崇祀兮歷春秋而設酒漿慮廢興其難繼兮置田畝以備牛羊奈守僧之不肖兮屢變易而悲滄桑將振起其舊業兮似精衛之填海於微茫一繩祖而一倡義兮尙築舍於道旁酌清泉而奠村醪兮猶扼腕乎祭章

明鄒衡詩清風千古名猶在負郭祠堂已蔓荆鄉里有人新廟貌遠尋蕭寺拜先生 孫詢詩九墩九穴變荒阡玉骨深埋幾百年青史名因詞客載白牛塘藉路人傳石麟

楓涇小志

卷一

建置

三十八

瘞雨生春草野鳥啼晴破曉煙一片忠魂招不返老夫空有淚潜然 江淵詩青苗一疏忤權臣拂袖東歸野水濱 侃侃名言垂簡策蕭蕭荒塚翳荆榛每聞猿鶴悲松月幾見雲初掃墓塵十里白牛涇上路雨苔煙草幾番新 劉侃詩居士祠前水一涇我來端拜仰儀型熙豐人物眞無愧吳越山川信有靈章疏儘堪留藥石衣冠端可炳丹青 後來更有如椽筆重爲清風勒墓銘 任泰詩風溪十里渺寒雲醞酒誰能薦渚蘋一自宋來凡幾世能如公者竟何人清風凜凜猶存古大節稜稜足抗塵天意似憐祠宇廢每令孤月照精神 錢春詩居士當年號白牛至今祠祭重春秋有才曾對御前策無念不爲天下憂涇水一灣

波後進泰山千古仰前修會稽太守唐丞相除卻先生孰  
與儔 嘉善主簿李錫詩諫疏初成氣未平吐辭懇懇爲  
蒼生直排安石奸邪法大起凝之愛敬情明月古祠仙鶴  
弔寒雲高塚野孤鳴我來載拜清風裏聊撷溪蘋奠一觥  
沈朝陽詩清風亭下竹森森玉雪寒生客子襟特爲表  
賢來社里豈因乘興訪山陰再傾元酒千秋祀一疏青苗  
萬古心踏遍九墩人不見斷碑荒草夕陽沈 江吉詩詔  
應賢良第一名當年文采震公卿抗章竟沮青苗法歸計  
還尋白犢涇耿耿孤忠昭汗簡稜稜直節表生平英靈重  
格春秋祭爲喜新祠已落成 王琳詩聖宋登庸冠制科  
迹因忤旨遯林阿身騎白犢名還在涇號清風世不磨配

享二賢能有幾名存片石已無多懸知祠宇重新後千載  
英靈月下過 楊正詩祠宇荒涼枕首坵清風涇口水東  
流千年忠義名猶在一代權奸事已休行跡可憐封草莽  
斷碑忍見翳松楸我慚晚學居鄰左猶想先生跨白牛  
邑丞倪璣詩涇水來清風故祠香火崇晚辭花縣令早作  
白牛翁直道紛更際高名貶謫中恍疑相對語孤鶴唳晴  
空 抗疏違安石清風滿故鄉騎牛臨澗谷吹笛在滄浪  
早歲功名薄賢聲科目光百年重祀典令德莫相忘 江  
惠詩懇爲青苗幾上章固知新法是民殃死生一節乾坤  
重姓氏千秋史册香涇號白牛煙草滿墳高石獸雨苔荒  
古祠己有山僧守每聽寒鐘送夕陽 周澤詩曉叱長鬚

遠駕船白牛涇上弔先賢清風自喜看碑記寒食誰能掃  
墓田直節一時金石<sup>實</sup>賁芳名萬古日星懸青苗若使從公  
議不聽天津叫杜鵑 周珍詩舟艤荒村落日遲仰公高  
節拜公祠賢良一策古今重忠義滿腔天地知欲問白牛  
尋舊跡忍看碧蘚上殘碑逢人若論青苗法誰爲蒼生不  
淚垂 沈槩詩當年壯氣薄浮雲一疏清風萬古聞可是  
星江無白犢故園歸計尙勞君 國朝沈煌詩古寺帀修  
竹間雲終日旋摳衣禮良士簪筆記當年市裏騎牛入塘  
前負耒還至今邨落下民有古人賢 毛蕃詩剥啄聲高  
野老愁凌風勁翮滿空秋可憐朝右無青眼遂使塘前記  
白牛弱柳垂條疎雨寂蒼松凝黛淡煙浮行人駐馬徘徊

楓涇小志

卷二

建置

四十

望指點長隄說舊游 毛正學詩丹心耿耿剩孤忠祠宇  
莊嚴夕照紅天子可能知勁節路人長自憶清風高才果  
屬三賢侶逸致曾傳六客中遙指匡廬應不遠余山西畔  
武塘東 沈辰垣詩扁舟斜繫柳隄晴憑弔先賢感慨生  
當之可曾籌國計如公端不負科名批鱗亮節忠誠著跨  
犢高風黻冕輕一自庭除修飭後瓣香還動野人情 黃  
士宏詩祖制紛更記宋朝頒行新法立嚴條九州疾苦曾  
疏上五老登臨友共招學道本期宗聖哲棄官惟喜伴漁  
樵莫緣祠墓依僧寺認作談空一佛寮

名人題詠不勝記  
載茲擇甚最著者

錄於  
編

海忠介公祠 在一保十一圖皇字圩夏家村



彰義祠 在主簿署右本爲二忠祠祀明陣亡主簿李錫百戶

賴恩同治初陳宗溥等稟請撫憲以 國朝本境陣亡兩江

即補參將王玉林附之

明正德癸酉江西姚源盜犯衢州嘉善縣主簿李錫率兵往禦力竭遇害

贈知縣詔立祠祀之嘉靖甲寅倭夷突至百戶賴恩血戰禦敵用大旗捲賊賊多就縛卒中伏礮死 國朝同治癸亥冬

粵匪猶踞張涇匯參將王玉林攻之中礮死

義祠 在鎮北永鎮庵左道光初巡檢成其謀募建以祀里之

歿而無後者同治初毀於兵光緒二十二年里人葉世熊募

貲重建

顧氏世德祠 在鎮南秀南坊明顧際明建共置義田六百畝

善志今廢

費氏支祠 在一保十八圖無懷浜 國朝康熙五十年費升

楓涇小志

卷二

建置

四十一

俊建並置祀田

戴氏支祠 在鎮南響水橋西雍正四年戴大用建置義田一

百三十三畝 善志今廢

陳氏毓秀祠 在鎮南蕘塘浜陳仁創址雍正十二年廷玉建

起鳳爲之襄辦有恆捐祭田一百畝孝泳創義莊祁贊成之

後秉浩曠續置田數頃共計一十三頃有奇

陳廷慶義莊記憶戊戌歲余以拔萃應 廷試入都初謁

族伯光祿楓崖先生醉乎其容藹乎其言嘗語余曰予以

四門通籍幸邀 殊遇直 內廷躋卿寺廩祿所贏儲至

百有五十鎰擬授諸羣從節縮經營置田五頃以贍宗族

先生從孫今甘肅方伯紅圍時隨從京邸在四庫館効力

竭力贊成之未幾先生歸道山越三十年先生令嗣二癡猶子映波兩參軍貽書告余曰某等敬承先志置田已如數有零又籌宗祠祭產所入添置二頃有餘供歲時祭掃屬余記而傳之洵哉先生之志遂先生之澤長矣考周禮大司徒以六行教萬民曰孝弟睦婣任恤又設刑以糾之周書君陳篇孝乎惟孝友于兄弟漢儒述之釐爲四字與紫陽疏魯論迴殊其實友與孝並重能友斯能孝義較明哲西漢而後均田之法廢富者日益富盡以供宮室服食舟車僕賃之需甚至歌童舞女珍寶填箱而族人之貧不能舉火者曾不一顧嗚呼教化之不行風會之日漓一至於斯惟宋范文正公出鎮西陲入參軍府義田千畝錢公

輔爲之記于忠宣公踵而擴之載史編登志乘自元訖明代輿勿替至我朝掇巍科膺膺仕者聯翩鵲起視文正公所建三四倍之矧值國家敦敘協和時雍於變恭讀聖諭廣訓置義田以贍貧乏聞風起者若錫山華氏彭城季氏吳門陶氏我郡張氏卽余從祖樂山公先大夫碣庵公皆仿而爲之而必以范氏爲推首間嘗登天平山萬笏之域高義之園瞻濟時良相之額天章雲漢照耀於湖山明瑟之間可不謂美且備歟今光祿公以文學侍從上結主知而紅圍方伯繡斧所臨適前賢籌十萬甲兵之地兩參軍又復移孝作忠而昌而熾行見天語褒嘉與范氏後先相輝映余叨居譜末又親聆光祿公緒論爰不揣弁

陋而記之

蔡氏支祠 在鎮南杏花坊乾隆四年蔡維熊建置義田三百

善志 畝 咸豐十年燬於寇

葉氏支祠 在四南區大地圩乾隆四年葉聲聞建祠有碑記二

吳氏支祠 在四南區往字圩乾隆時吳本禮建咸豐十一年

毀於寇

許公祠 在青浦四十一保五十四圖伐字圩祀內江縣知縣

許椿乾隆四十八年子煌建善志 咸豐十一年毀於寇光緒初

年許周氏重建五楹

顧光旭祠堂碑記往予權臬蜀中 王師方進剿兩金川

戎馬倉皇飛輓絡繹於道屬吏之才且賢者司餽餉直郵

楓涇小志

卷二 建置

四十二

傳各供乃職以余所知若老成持重才畧過人而能盡瘁不違者則內江令許君椿其一也癸巳夏猝有木果木之變文臣先後死事二十六人趙農部文哲王比部日杏而外皆蜀之守令與其丞尉而許君實與其難己而 卹命下許君贈道銜階中憲大夫賜祭葬祀昭忠祠蔭一子而余因稽古祀典以死勤事則祀之義立慰忠祠於成都並祀諸臣余猶憶祠成日余親奠爵歌招魂詞而許君之鄉人農部曹公秋漁爲文以祭相與低徊激昂大慟不能置許君既死骸骨不歸乙未春君之子煌以君衣冠葬青浦縣白牛蕩之伐圩既葬除服煌以蔭令山西之武鄉安邑越八年而煌以母老終養歸始構君祠於墓左余惟君之

大節載在 國史炳若日星而煌復以余舊嘗宦蜀知君  
尤深屬爲文余乃撮其略文於祠君字董園號南薌椿其  
名世爲江南休甯望族曾祖世俊明廣東海陽縣尉始徙  
浙江嘉善之楓涇鎮祖鉉考授州同知父經歲貢生皆以  
君貴贈文林郎內江縣知縣君少工詩爲時輩所推中乾  
隆辛酉舉人丙戌揀選知縣試用四川旣至上官器其才  
委署雙流儀隴等縣歷有政聲乾隆丁亥春 王師征緬  
甸蜀省派供驛馬縣令爲督解官而滇南山勢猛峻塗徑  
崎嶇重以春夏多嵐瘴觸者輒死人皆震懼莫敢行上官  
委灌縣知縣沈鵬令己下矣沈母老且多病然業受命不  
敢辭君慨然請代上官義之乃以委君而君夙夜恪勤調

度秩然未半載而報命讀君南征草二卷可想見其據鞍  
嘯歌自得也事竣授內江令寬嚴有法膺上考居亡何會  
兩金川蠢動大學士定邊將軍溫公福帥師進討屬君司  
正林口臺站管理餽餉君轉輸不竭軍給以饒旣又調登  
春臺站二月我師次木果木六月戊戌師潰旋美諾辛丑  
賊突至登春臺站君率站夫持器械與賊力戰傷賊甚多  
卒以救援不至爲賊寸磔而死先是正月君賦詠懷詩二  
十六首寄其子有七尺軀何愛 君恩欲報難之句識者  
知其先識而君之平日忠義自矢已隱然溢於言表易曰  
王臣蹇蹇匪躬之故詩曰彼其之子舍命不渝許君有焉  
乃者嗣君煌構祠以妥君靈用彰我 國家褒忠大典而

君當日慷慨赴死凜凜烈丈夫之概照人耳目非特邦家  
之光閭里亦與有榮施君其含笑於九京也夫余旣紀君  
之顛末乃復綴歌詞以侑君享歌曰山萬重兮雲萬重書  
生投筆兮從戎賊倉皇兮若蟻蜂張空拳兮計窮不返顧  
兮旋踵殉國難兮從容 詔下重泉兮丕嘉乃忠又歌曰  
君樂土兮南方馬革裹兮何望魂歸來兮故鄉胡慮兮道  
阻且長松栴旅楹兮俎豆有光子子孫孫兮以奉烝嘗  
王氏宗祠 在四中區生字圩乾隆六十年王啓焜建置義田  
八百畝善志今廢

王昶祠堂記楓涇在青浦西南四十里有湖蕩以限之今  
屬浙江之嘉善縣是爲吾弟四川鹽茶道南明所居南明

楓涇小志

卷一

建置

四十五

與余族望同出太原服屬疏遠不能考行輩然小余七歲  
故自少以兄事余余在四川參軍事南明時爲成都縣知  
縣嘗謂余曰吾系自元以來乃可考元統至正間有富一  
公者以鹽法官家居爲嘉興之奉賢鄉人至正七年因壻  
戴光遠勗義塾於清風涇來助教事遂卜居焉是爲楓涇  
始祖迄今十三世矣世以耕讀爲業孝弟忠信爲教子姓  
繁衍間有達者皆食先澤之貽小時侍奉曾王父庭植公  
語次嘗以未及建祠爲恨焜今方爲縣令力淺且軍事方  
殷迢隔六千里又無可任其事者有願未遂也閱二十六  
年而南明爲川東道會其弟映川由雲南平彝縣知縣乞  
養歸迺屬以興築之事經始於乾隆五十八年至六十年

而祠堂成其地在所居之東斗門涇其屋凡四重前中爲門左右以樓司門者進爲廳事以合族人又進爲堂以供族食之地又進爲堂上有樓樓奉始祖下奉四代之主其廣皆五楹左右皆翼以房序又置義田五百畝以供祀事而以其餘贍族人其祀以春秋冬則奉始祖合食凡拜跪酌獻牲牢洒醴一從徽國文公之書嗚呼南明之任成都也時值 王師戡兩金川羽檄旁午南明夙夜執掌積勞六七年由令而牧而守漸至通顯旣而西番廓爾喀之役則又時往打箭鑪徼外督理餽餉以迄于箴事故益蒙

聖天子之知歷擢川東巡道以至今職且 賜戴孔雀翎用示 優寵而三代皆封中憲大夫如其官茲者三年大

計卓異入覲將復膺 聖天子特達之知行得請假歸鄉肇舉焚黃令典瞻棖楠之方新薦鼎俎之有碩率是宗人踴躍濟濟遙追來孝以成祖父未成之夙志顧不偉歟雖然南明之抱此志垂四十年奔俸入銖積而寸累之又得其配胡恭人存日勤紡績鬻簪珥以爲之助始得以有成蓋其成之難如此曩弟子孫從而祭者思勗造之艱難勤耕讀守孝弟益修而明之使挈舟來往者於湖波晻靄雲樹蒺藜之外望其巍然翼然誇美歆羨謂王氏先澤久而弗替也是眞奕葉之光矣故於南明之請記書其緣起俾鑱於石以示後人云

程氏宗祠 在鎮南秀南里嘉慶十四年程廷璵與其弟廷瑚

廷連捐建奏請立案後不戒於火光緒初重建有義田一千餘畝

錢楷義田記昔周禮著六行之目曰孝弟睦婣任卹六者統於孝而已矣父母之於子也飢而食之寒而衣之無能也而誨之吾宗族之昆弟子孫雖甚疎且久其始皆與吾共毛裏分形氣者而不爲之所吾先之爲父母者不安焉是故由親以及疏由疏以及愈疏古之人創義田以贍族所謂本父母之心爲心誼至美法至良歟方今 聖朝以孝治天下 訓諭煌煌使民以敦本爲先凡敬讀者誠宜各自勉于睦婣任卹以極致其孝也而吾浙嘉善縣之程氏於是有義莊之設足見 聖化之所興起而人心風

俗之厚即一邑一家而徵之遠者也烏可以勿記歟即程氏義莊之創與楷之樂爲程氏記者有由來矣謹考程氏之自歛遷浙也由雙石府君始府君以孫旭江府君貴貲贈奉直大夫自後遂以科第起家爲里中之望歷今五世累有清德宜其後之碩大而多賢也雙石府君之元孫爲理孚先生性篤摯嘗顧族人而慨然曰吾先人念吾族實繁常欲取則於宋范氏明顧氏創義田相調卹而力未逮焉以屬吾舅弟今吾廬有生產凍餒之不虞皆先澤也吾父以祖考之心爲心吾敢不以吾父之心爲心乎乃暨諸伯仲殫心集力益寡掄盈者有年於是慮其散也爲之祠慮其耗也爲之田慮其曠也爲之塾慮其無稽也爲之

籍爲之司慮其後之不能守而售且棄也爲之錄而上之以存於官而義莊以成凡族人貧者服食嫁娶喪葬以至入學應試之事悉取給于是又於其間優老而卹孤獎賢而懲惰可謂克成先志者矣書來以屬其甥楷記之伏念楷程之自出也楷少孤自幼以及成人幸而得有今日者皆吾太夫人之教誨而太夫人所以教子者又吾外氏祖父之遺訓也吾外氏族人而無以自存太夫人將顧而惻焉今吾舅氏乃能分財推愛以庇厥宗非特以慰程氏而所以慰吾太夫人心者於是在焉他日楷歸拜於祠下因得瞻旭江府君之几筵追溯光前振後之澤更徧謁高曾繾思舊德環視牖庭祁祁濟濟尊者以導卑者以率耆耄

者壽而康鬣髻者敏而碩莫不室和躬泰學殖行修積善之慶方無涯涘楷固欣欣然樂道之太夫人之前以爲勸膳承顏之一助然則吾舅氏不以屬他人而以屬楷者將母有意於斯而亦使楷得以綴名譜末以稍申報本之心也所謂不匱者道固然乎楷其敢辭爰就來書所述而爲之記義莊總爲室三楹其中祠前後三楹前祀考後祀妣自雙石府君而下皆得入焉又前爲拜廳其左爲積粟之室爲主其事者筦租稽籍之所亦前後三楹其右爲家塾前後二楹田爲畝一千有奇爲米歲收一千四百餘石凡分給規條十支領規條十經理規條十本未具其中不盡記記其大凡泐之石以貽來者



張氏支祠 在鎮南南楊村嘉慶十五年張修槎建成豐十年  
毀於寇

錢樾支祠記古者命士以上咸得立廟故君子將營宮室  
宗廟爲先考之禮自三廟以至一廟雖隆殺不同而意皆  
主乎追養繼孝三代下廟制不詳士大夫情殷念祖者每  
以建立宗祠爲重然貧者力有未能其豐於財者或視爲  
緩圖數傳而後服屬稍疏至有不能舉其支派者則以敬  
宗收族之道闕如也張氏爲我邑望族其先有隱耕者自  
上虞遷居魏塘五世祖鄉飲賓愛泉公再遷楓涇之南陽  
村孝友端慤鄉里推長者愛泉公三傳至書蕉公積學砥  
行有古君子風嘗擬建創宗祠以妥先靈志焉未逮實深

望於後人玉河爲書蕉公子定省之下敬識不忘逮書蕉  
捐館後玉河每懷遺訓常懼勿克負荷居恆與伯叔昆弟  
言及建祠輒泫然泣下於是克勤克儉每歲除祭祀伏臘  
外節衣縮食閱二十餘年始能擇地建祠奉粟主而合祀  
焉祠之中爲堂爲廡爲溜爲庖齊宿有所盥洗有所以及  
頒昨飲福之地無不具備且也慎筭鑰嚴灑掃後嗣能增  
廣義田者褒以示勸敗壞成規者罰以示戒籌畫稽詳美  
輪美奐旣奉高曾以下神主於正室又於室之後築崇樓  
專祀書蕉公非特自仁率親之誼應爾并以見宗祠之建  
惟書蕉倡議於前而玉河續成於後善則歸親何其用情  
之摯也嗟乎世之擁厚貲而號素封者豈少哉不聞汲汲

於此玉河家僅中資獨能肩承克展前人未伸之志視彼封殖自豪者賢不肖何如耶祠之建也經始於己己之夏今落成有日矣玉河偕其宗族諏日荐牲仰瞻棖桷肅布几筵承先啓後之心更有纏綿無己者子姓蕃昌永綏後福吾知張氏之興正未有艾也余與張夙敦姻好悉其家風循謹子弟皆束脩自愛而天性純篤善體親心尤於玉河首屈一指詩有之曰視民不怵君子是則是傲若玉河者洵可則傲矣余故欽羨而樂爲之記

黃氏支祠 在四南區來字圩嘉慶時黃廷佐廷璋等建咸豐十年毀於寇

沈氏支祠 在鎮北俞家橋西嘉慶二十三年沈起鳳創子壩

楓涇小志

卷一

建置

五十

仲杰集族衆捐貲規畫成之咸豐十年毀於寇光緒十六年裔孫椿倡議規復與從叔守洮等重建廳事并葺大門

唐家泰祠堂記略曰楓溪沈氏先世居湖州之竹墩康熙初由茸城遷居於楓至嘉慶季年怡亭封翁起鳳卜地於

鎮西婁境始字圩勸建家祠其子香渚封翁壩少梁廣文

仲杰以先志未竟擘畫成之祀必虔器必飭致祭有堂飲福有所而祠事於是乎箴又慮其難於持久也集族衆捐

田七百畝以供祠祀歲修之費世守勿替咸豐庚申罹兵燹祠毀時主持無人田亦因之而析譜琴先生兆奎軫念

創始維艱祠宇亟宜規復以其曾大父允充忠公捐祠祀田一百畝大父呂樵公捐墓祭田六十畝有奇掌其出納擬

積十年租餘計能集事既知衆見參差力有未逮俾羣季司之而志猶汲汲也未十年先生歸道山易簣時命其令子椿曰予所抱憾者家祠未復尙待後人汝其識之又十年其子椿少譜廣文恪遵遺訓殫精竭慮數商於季父養田少湖兩上舍兆麒兆英暨修士學博守洮學博復集族衆捐貲以益其不足始克於光緒庚寅二月建正室葺門庭以時祭亨至若前制之觀瞻成規之克復留以有待然有志者不難竟其功也

朱氏支祠 在三保界涇嘉慶時建

楊氏支祠 在九北區草里孫嘉慶時楊美江等建捐置義田一千餘畝由縣詳請奏奉 諭旨允准交部立案並給議敘

楓涇小志

卷一

建置

五十一

謝氏支祠 在鎮南東港頭光緒十二年謝丕烈等以適園兵燹毀餘之屋改建

姚氏支祠 在鎮北馮家街北道光十七年姚朝陞姚朝奎姚朝達自婁邑范浜遷居鎮南子姓繁衍至光緒九年朝陞己卒朝奎朝達集族衆合議將故父燦膳育婁邑田四十八畝有奇並留慶坊上下岸市房兩所充作春秋祭祀及燦之裔孫濟貧之需十四年即將留慶坊上岸房屋創立支祠稟呈

婁縣立案

新補

許氏支祠 在鎮南虹橋東許廷槐廷楨捐置基地許秉樞遵嗣父母遺命捐義田八百餘畝先儘數年租息爲創建祠堂置備祭器等需工竣後永作祠祀贍族之費其擘畫經營乃

秉樞姊錢遵訓室淑貞力居多於光緒十六年由縣詳請浙撫崧中丞駿奏奉 諭旨允准交部立案 欽旌樂善好施坊額

崧駿祠堂義田記余自三吳奉 命巡撫浙江時嘉善縣恩騎尉許秉樞新置義田建宗祠有司據事來告迺具疏上 聞 朝廷嘉獎 詔旌其閭綽楔煌煌輝映一邑誠盛事也許氏奮籍休甯先世有諱世俊者始遷嘉善之楓涇數傳有四川內江令 卹贈道銜椿殉節於木果木其子煌以蔭宰山西武鄉縣秉樞之高祖也議建祠置田贍其族人病卒未果至秉樞嗣父承澤母周氏以勤儉積資購置義田規模畧具而承澤周氏又相繼去世周氏之卒

也命其所生女錢許氏與秉樞續成之錢許氏既葬父母於錢塘西湖之南開化涼亭乃經營籌畫至鬻簪珥以補不足合負郭常稔田八百餘畝周濟貧族喪葬有資嫁娶有費讀書應試有飲助鰥寡孤獨廢疾者皆有所養又建祠於邑之四中區前爲門中爲堂後爲室以奉粟主旁設義田莊舍春秋則娶族之長幼致祭於祠俎豆莘莘禮儀秩秩於是邑之人咸歎秉樞克繼先志成此隆規而錢許氏以已嫁一女子體母遺命力助其成尤爲難得也祠將成秉樞介其姊婿錢太守遵訓請余爲記勒諸麗牲之石余與太守有世誼不敢辭因慨近世風俗澆漓往往有厚於一已而漠視同族者又以宗子法廢往往有族衆蕃庶

而宗廟猶未立者其失豈小也哉許氏以忠孝世其家今更修明彝典燦然有合於尊祖敬宗收族之大義此豈特一姓之庥其有補於國家教化甚鉅也嗚呼如許氏者足以風里閭而挽薄俗矣爰書其大概而繫之以詩其詞曰太岳啓胄休有烈光遠葉長源繁衍魏塘於穆中憲効忠疆場大節巍然子孫永昌曰有承澤樹德於鄉深維族衆緩急相將恭儉撙節積儲餼糧散贍同宗仁粟義漿令嗣繼述賢女贊襄顧瞻先德聿建宗祊有楹有榭樹之表坊秋霜春露於禴於嘗家廟翼翼遠並顏堂義田昀昀上符范莊展親合食萬民所望保世滋大積善餘慶嵯峨豐珉照耀冠裳鏤辭眎遠千秋馨香

楓涇小志

卷二

建置

五十三

畢氏支祠 在鎮南圓明橋西光緒三十一年畢以培等以族

中無嗣房屋一所售貲創建

以下新纂

沈氏啓秀祠 在鎮北桃源巷宣統元年沈崧暨姪人焄龍光

集貲重建

陸炳琦祠堂記略曰沈氏系出梁太師隱侯約二十八世有諱國祥者隱居武康仙臺山生子二長曰子誠次曰子敬子敬徙行溪今爲竹墩支子誠即今楓涇沈氏分支之祖也四傳至英由舉人官滁州訓導英之孫七品義官貢生產明嘉靖中遂卜居華亭之清風涇舊有支祠在桃源巷久圯無存今其裔孫崧與姪人焄龍光兩茂才力謀規復始克於宣統元年鳩工庀材重興祠宇龍光出余門下

今請記於余爰撮其世系俾其後世有所觀感興起云  
葉氏支祠 在鎮北界河內宣統元年葉世熊世樹等集貲創  
建節婦葉王氏助貲尤多

葉世熊祠堂記曰我葉氏自宋石林公始居洞庭東山建  
有宗祠厥俊支派蕃衍散遷各處共分十派或建支祠或  
立專祠各盡其追遠之誠我九世祖華南公在明崇禎時  
自吳江分湖遷居青浦縣之蒸里世安耕讀至曾祖上舍  
淡齋公孝友性成積學早世會祖妣姚太孺人於道光甲  
午年挈長子西村公次子蘭舟公遷居楓溪置田五十畝  
爲祭掃之需晚年又續置田二百畝意在增益祭祀經費  
後因未建祠宇田遂析殊可惜也光緒初大憲採遺行

特以淡齋公孝行請於 朝旌表孝子例得建祠致祭迨  
二十四年春<sup>世熊</sup>等合購婁縣一保十一圖地畝許爲建  
祠基址今夏我從弟<sup>世樹</sup>謂余曰楓鎮自兵燹後如許氏  
畢氏沈氏先後建祠我家自購有祠基以來荏苒已十餘  
載矣亟宜經營以竟前志我兄稼甫<sup>世瑜</sup>亦謂余曰溯始  
議建祠時昆季十有一人今已云亡者七而姪輩中亦亡  
其七人況兄年近八旬餘事俱可不問惟此家祠未建中  
懷耿耿不忘今則時不可失矣余惶然起曰是固余之夙  
願也竊思勗之難繼之匪易貴乎羣策羣力世守弗替諸  
姪輩俱欣欣然色喜從母王聞之許以所積歷年田租鍼  
蒞餘貲協助於是相與集貲鳩工庀材各竭心力先建前

進中進各五楹期以半載落成尊旌孝公爲不祧之祖公  
之後皆得入焉從此春秋享祀俎豆莘莘有合乎尊祖敬  
宗之義也他日蒸里議建宗祠凡在後人均當量力攸助  
以成完美之舉 世熊 不才不能闡揚先德爰述其緣起如  
此

續修楓涇小志校勘記按此特重排印多誤字雖經外復印作此誤校尚

閱者再以備

目錄十一行汛誤汎

卷一九頁十三行註中平誤年 十二頁七行註中三字字皆

誤字 八行註中宇誤字 十一行註中四字字皆誤字

十二行註中宇誤字 十三行註中宇誤字

卷二十二頁十四行註中竣誤挨 十六頁十行八誤入 二

十三頁二十行梁誤梁 二十四頁十行銀杏倒置 三十

一頁十一行檻誤楹 二十八頁十三行潛誤潑 五十四

頁八行曾誤會

卷三一頁十六行註中六字脫 十七頁十七行註中註誤駐

卷四六頁十行祺誤棋 九頁二行註中己誤乙 十八頁七

行輝誤輝 二十四頁七行諮議廳誤庶務科 二十六頁

七行輝誤輝 三十頁十八行註中襲誤襲

卷五五頁十八行謁誤竭 十六頁十八行隆誤降 二十三

頁十七行郝誤祁 二十四頁 十八行詞誤祠 三十三頁

二行疊誤壘 四行州誤洲 五行貫誤貫

卷六三頁九行註中誥誤詰 十一頁七行試誤力 八行力

不改 十六頁十一行育嬰倒置 二十四頁七行於誤有

卷七七行女年倒置 十四頁十二行墉誤塘 三十頁十行

現下脫年 三十一頁十七行氏下脫亦註中胡誤湖

卷八三頁五行註中熊誤羆 末行眇誤盼 四頁六行穎誤

穎 七頁七行篡誤纂 十四頁十八行帨誤悅 十五頁

二行慕誤冪 二十一行澈誤激 十九頁十七行疆誤疆

二十七頁九行頡誤頡 二十頁十行曾誤會

卷九四頁十二行註中脫世字 五頁八行註中鑑字不全

十二頁十八行註中志誤去

卷十九頁十九行遭誤曹 十頁十八行著誤若 十八頁十

七行洎誤泊 十九行予誤予 二十一頁一行冤誤冕